


## Nxoogko bpasa

Sū Sandawesū-dturudtāda hisa ncemesu nxoogko bpasaasa lhadtawaai', lhaa wak'aaso nī gkumbu chorōsē lhaa-tl'abisoō ncemesūsū nī hesu-makhaeena balhimaagkwa'iso. O'tche aa dlo'ikhē tl'aā indza tl'ongeē nī indza-sangkā'ī leeba-tee gkisokhi haanga'waīdtana khe'waaso. Hia leeba-teē beeba tlaagkii', āxhuma-teedtana khe'waaso. Nī teekhēda tchaa gkisokhi choromseē nī tee-tchinakhēda khubpu'umseeso. Gkumbuts'igki tchaa ts'ekhe chorōseē nī khubpu'seeso lak'amsokhe' gkwaa mee nqerēgaa cī koō kaa. Nī hia tl'wādtai', nxoogkōso tchaa-q'eke hoq'ots'i nxīts'iso gkwaa mee nqerēgaa kaa'ī. Heso-ioōsugki hisa tl'ee-koonasa hik'ii', ts'umbuts'i tchaa-q'eke nxīts'isu gkwaa mee nxoogkōgaa la'oowasi. Nxoogkōsogkimee gitl'e dlomoodta, gkalee ts'ekhe dlommaakhi'ībpo. Hia nxoō dtēgaa tcheets'ii', hewe-qwaāna mapī-tee ncu'waabpo nxoo lhak'ee nī gitl'e qogkowaats'ebpo bpaa hewe'ī x'uwāgkiwai.

Hia tl'wāgaa tlaagkits'ii', ncemeseenaale' x'a'seei' au dtets'i leeba-teekhēgaa x'a'seewai', wasongo me'waaso boriwāgkiso nī indza-sangka'ī nī teekhē k'wak'awaaso erere'so'ī. Dtaangkisi' udtāa wasongo mirimoona nī'wasisōso dtitchoaa ikhi ncweewa, tcūgki gkirigoa' xhadtana' hic'awaā. Swe nqekhēdtasi' wasongo tchiasots'a' dtakhi bori. Ncwee'ō heeu hia' ncu'waaī', Sandawesū ikho aarets'i gka' tl'wā chiits'e bpaa x'ooi.

Yesu-x'aaisōsō nī Yesū, wekē ba'eteē nī ts'a-mogoongoaa q'oo'isi' hewe-x'aaisōso ura' gkwadtiwa. Bpaa tcūsi' Yesū ikha lade'ī hingo HEWE tchia c'aangkina sambose, nī heso-aarets'ī hewena didi'seeso. Do'oo Warangee-bō cā higkia bo, Lukasi-gkitabudta 8:24b-25



Yesū bpaa haangā wekēga khats'ewats'ee nī ts'a-mogoongōgkia, gkwaa tchiaa la'dtewa. Gkwaa putl'umats'i.

Bpaa ikha xagkats'a'ī, gkiagka', "Sī-aarets'ī hambee?" Aa ayeē nī'ā ncoō ikha' xagkats'awāgki, gkia'gka', "Heusi'na ho, bpaa wekē nī ts'a-mogoongogki khats'e, bpakhi la'dte!"